

欽定剿平三省邪匪方略

欽定剿平三省邪匪方略正編卷三百十五

壬戌年

五月初一日

庚午

額勒登保奏言查賊匪竄匿之

處係在萬山之中縱橫三四百里峭壁深林人

跡罕到十四五等日扎克塔爾格布舍率同副

將張瑗由正灣溝鐵砬溝一帶轟擊均因地勢

險阻未能深入維時楊遇春帶兵由寧陝賈家

營進發聞信卽由七步溝抄出石溝口於十六

日至蕉園溝邊住西面該匪是日夜間竄至蕉
溝口於楊遇春營外分投滋擾勢甚兇悍意欲
衝過營卡西竄楊遇春李應貴等分帶兵勇出
卡迎擊鎗箭並發賊匪敗退我兵乘夜追趕生
擒三十餘名黎明查得營外賊屍二十七具是
日賊匪遁入五大谷八大谷一帶密林該處萬
分險阻馬不能前卽步隊亦須攀援竹木而進

臣以該匪恃險不出我兵旣一時不能得手又

何可日久相持遂卽飭令扎克塔爾格布舍等

將兵撤至東腰竹嶺古磔墩懶板樅一帶暫劄

顧定東北設伏以待留出東南一路

臣

帶領官

兵顧住北而馳抵洵陽壩派令侍衛舒林阿捫

欽保遊擊王兆龍帶領滿漢兵勇於西北之嚮

硎溝雙龍橋一帶潛伏並調令江口叅將李英

多寧陝遊擊林向榮各帶官兵於西面之蓮花

石火地等處設卡防備

臣

於十九日將營盤留

於洵陽壩交全德副將王兆夢大張聲勢嚴密

防範率領副將張廷楷遊擊劉健標張鍾珙並

孟興保等酌帶兵勇六七百名前赴上壩一路

與楊遇春聯絡聲勢督催進剿是日晚間該匪

果向東竄扎克塔爾格布舍等率兵截殺生擒

十九名殺斃二十餘名二十日楊遇春李應貴
等徒步帶兵復由古木坪逼剿殺斃十餘人生
擒十五名賊匪不能抗拒退入五大谷九曲灣
等處臣帶兵趕到次日復督飭楊遇春李應貴
等帶兵步行入林併力轟逼追逐三十餘里殺
斃九名并見有滾巖跌斃者該匪不敢出林卽
竄上山巔於無路之處盤旋奔避是夜三更時

竄近蓮花石營卡叅將李英多率兵迎擊殺斃
數名該匪又奔向火地撲卡復經遊擊林向榮
等鎗礮轟退奔入溝內

臣

聞信一面知會楊遇

春帶兵前來一面率領官兵追趕沿途殲斃賊
十數名該匪亡命疾趨於蓮花石火地中間爬
越陡壁荒山向西北而遁適總兵楊芳於七佛
溝聞報帶兵跟剿亦擒斬十餘人楊遇春同李

應貴亦帶兵趕到

臣

當飭令該提鎮等乘賊匪

驚慌亂竄之際或分路兜截或併力合剿

臣

於

二十二日晚間仍趕到洵陽壩顧住東北而進

並飛調扎克塔爾格布舍等帶兵由琵琶嶺金

雞河至兩河顧住北面向西截剿伏念

臣

目帶

兵剿辦以來凡大股小股賊匪俱無如此股之

狡詭可恨者所幸日內數路官兵併力窮追均

相距不遠定可痛加剿洗尅日掃除至劉永受
股匪前經楊芳分派兵勇疊次斬獲只剩四十
餘名續經官兵殲斃二名濠巖跌斃數名又緝
獲二十名所餘賊匪現在不過十數名楊芳已
分撥兵勇數百名在各處搜捕並偵探劉永受
確蹤緝拿務獲至張魏餘匪自竄入陝境之後
慶成及道員朱爾漢等連次截擊擒斬多人茲

又接陸存仁及慶成來信賊匪分股逃竄一股
百餘人由沔縣奔竄寧羗革職總兵胡定泰緊
躡前往一股百餘人由寧羗竄往廣元遊擊李
朝顯都司張起鰲帶兵跟追是該匪均已逼入
川境豐紳及道員劉清現在神宣驛一帶臣已
飭令迅速迎擊並咨會慶成督飭將弁等與豐
紳等併力掃除

額勒登保又奏言竊張魏後股賊匪四五百人
於三月二十四日竄入寧羗關口壩總兵永明
因患病不能動關原擊宋鉞米章不能帶兵截
回前經奉

旨令

臣

查明據實奏

臣

查關口壩本有營卡原係

叅將李殿元在彼防堵因慶成以關口壩在陝
境裡層不如李家壩緊逼川境之爲扼要是以

於去冬令李殿元移駐李家壩防堵而關口壩
未設營卡仍係該叅將汛地此次賊匪由該叅
將李殿元汛地逸出其疎虞之咎實所難辭至
竄出關口壩之後宋鉞米章未能扼住竄蹤其
攔截不力之咎亦無可諉但念賊匪究非於李
家壩越卡而過當賊匪竄至鶯嘴巖之時尙係
廣元地界李殿元卽帶兵探剿不料該匪於深

山密林盤旋無定乘間向關口壩奔逃相隔七八十里以致抄顧不及至宋鉞米章之未能將賊截回實由賊蹤之飄忽該遊擊等跟蹤緊追曾於戴家壩一帶得有斬獲雖爲數無多然尙無畏縮不前之處較之有心踈蹤者均覺有間該叅遊等在營帶兵有年素著勞績李殿元之弟遊擊李殿魁去春又經打仗陣亡亦尙可憫

應恭懇

聖恩將山西新平路叅將李殿元降爲都司甘肅涼
州鎮遊擊宋鉞西寧鎮遊擊米章二員拔去花
翎各降二級以守備用仍令帶兵防剿至總兵
永明係於三月十四日感冒風寒臣會接據稟
報賊匪係於二十三、四等日竄近陝境該鎮臥
病已八九日據稱頭暈目昏不能行動尙屬實

情昨接陸有仁來信亦稱該鎮在卡患病可知
其並無虛捏該鎮節次派出宋鉞米章帶領兵
勇九百餘名前往截剿尙未敢存忽畧之見合
無仰懇

聖恩免其查議均奏入

上命軍機大臣傳諭額勒登保曰苟逆一股經扎克
塔爾楊遇春格布舍連日分路追截雖稍有斬獲

而賊匪尙敢兩次偷撲營卡及至官兵奮力迎擊
又復爬越陡壁荒山仍向老林藏匿種種兇狡情
形實爲可恨現在該逆剿剩餘匪不過千餘人以
目前兵力而計不啻十數倍於賊自可尅期辦竣
然過於焦急或致冒險輕進設稍有疎虞轉中賊
計且殘逆無多以十數倍之兵力與之拚角亦屬
萬分不值額勒登保於迅速剿辦之中尤當持以

慎重務出萬全現在額勒登保在洵陽壩一帶前進顧住東北並令扎克塔爾等顧住北面向西截剿自應如此該處地方漸卽平坦不可令其再有折竄至劉永受一股餘匪不過十數名亦不值數百兵勇爲其牽綴著額勒登保酌派兵勇百餘名令楊芳統率在彼搜捕其餘騰出兵力令其幫剿苟逆一股更爲有益至張魏餘匪前據慶成奏到

經該提督奮力剿殺大得勝仗現將首逆魏洪升
及張添倫之姪張喜俱已拏獲想額勒登保尙未
得有此信現在餘匪分股奔竄既經逼入川境自
應一面令慶成督飭所派將弁緊躡前進一面飭
令川省帶兵之員迅速迎剿以收夾擊之效並著
額勒登保催令迅速剿淨爲要

同日

上諭內閣曰額勒登保奏查明前次賊匪竄過寧羌
關口壩總兵永明及各卡員弁未能堵截情形一
摺叅將李殿元駐紮李家壩於賊匪竄至廣元地
界卽帶兵探剿該匪於深山密林繞向關口壩奔
逃該叅將止係不能截住尙無畏葸情事李殿元
著以都司降補至遊擊宋鉞米章二員旣據查明
亦止係防剿不力並非有心疎縱宋鉞米章著拔

去花翎各降二級以守備用總兵永明患病屬實
情尙可原著加恩免其查議

初三日

壬申

德楞泰長齡奏言

臣

德楞泰前由東

湖趕追樊戴王會崔胡六股賊匪西至歸州白

馬灘尾躡賊蹤前進十六日抵紅溪鄉哨探樊

戴等逆抄出南溪地方復又東折下賓坪一帶

該處路通譚家壩與北岸之南沱並霧渡河相

近其勢仍欲東渡必須分兵兜截方可遏其去
路十七日我兵冒雨趕抵江坪已在賊之東北
商令賽冲阿色爾滾馬瑜等帶領馬步兵勇取
道登嶺油坪扼其正東

臣

督率溫春蒲尙佐帶

領兵勇由西北而向東南兩路官兵於十八日
黎明齊至譚家壩併力剿殺賊衆登時潰亂泥
淖之中各不相顧立斃賊一百三四十名生擒

郭勝彩李鄧氏等六十四名口時有該處寨民
張上文等率領團勇隨同官兵趕殺亦有擒斬
逆衆被迫情急紛紛拚命撲河又被兵勇趁勢
掩殺淹死賊匪一百餘人馬隊淌水步兵拽尾
蟬聯而過餘匪上天鷺池大山依險抗拒官兵
分投仰攻步步進逼賊不能支向沙坪河遁竄
追至河岸殺賊五六十名撲河淹斃六七十名

擒獲劉正華等三十餘名餘匪向黃家冲乘夜奔竄復被東湖之金寶寨民王孝周陳言謹等帶領團勇黑夜堵截殺賊三十餘名捉獲活賊周茂材等九名該匪連夜折竄羅鍋坪始向西北而逃二十一日戌刻探報該匪屯於興山之黃蓮垵界牌垵一帶距營七十里臣卽於二更發兵星夜前進天甫黎明前隊官兵行抵賊

屯不遠忽聞前面鎗礮之聲不絕旋報係長齡
等帶兵截剿將該逆等衝爲兩段一股向龔坪
青龍嘴東竄官兵業已尾躡前追一股向萬家
林三股水北逃無兵追剿經賽冲阿溫春色爾
滾馬瑜等帶兵跟追而去

臣

督率蒲尙佐等帶

兵繼進沿途斃賊四五十名擒獲牟盛禮等二
十一名計自十六日起至二十二日緊追焚戮

六股賊匪總不予以暇計共剿殺及淹斃賊匪
四百數十名擒獲賊匪一百二十餘名共獲馬
騾八十餘匹頭旗幟刀矛極多乘間逃出自回
原籍者無從悉數據獲犯供樊掌櫃等原去尋
蒲元帥合夥到界牌垵所剩不上二千人樊掌
櫃與王元帥被官兵追殺得緊也沒有有一定主
意或找蒲元帥大股合夥或到沒有官兵的地

方躲藏等語

臣

查樊戴王曾崔胡各逆內陳賊

原屬有限難民實在較多故一經緊趕勢卽瓦

解除訊出僞先鋒僞總兵陳玉材等三名並陳

賊楊士雲等三十五名分別戮割正法外其餘

均卽照例省釋至蒲添寶賊股知

臣

帶兵往西

追剿樊逆卽向東折茲據孫清元吉林泰等稟

報十三日官兵至霧渡河正在拿營賊衆分數

路來撲經官兵竭力迎剿賊匪一面與官兵打仗一面紛紛淌過河東孫清元等卽鼓勵兵勇緊跟馳擊共殺賊二百餘名被水淹斃者甚多擒獲活賊七十一名內訊有從賊日久者十七名當卽正法其餘難民概予省釋十五日追至焦贊垵適長齡帶兵自遠安之北湖頭前來兩路會合將該逆等截回賊已不能東趨嗣又接

崔長齡來信二十一日戌刻有東來賊匪屯於
火石嶺七里橋黃蓮坪諒係樊戴王曾崔胡等
逆被剿西來遂同總兵德昌帶兵由左路向火
石嶺遏其北竄孫清元吉林泰由右路登山截
其東逃孫清元等黎明時行抵界牌垵趕上賊
尾斃賊二十餘名賊驚潰奔竄長齡當令遊擊
王占鰲都司馬濟勝帶兵迎擊自率侍衛富齡

等帶馬隊衝殺斃賊三十餘名餘匪分路向東
北而逃一面帶兵跟追一面派兵搜捕共獲男
婦七十二名口及馬騾旗械等件訊出旗首賊
匪李大用等四十三名一概正法難民卽行省
釋令孫清元吉林泰等尾跟樊逆賊蹤前進二
十三日長齡輕騎前來會商臣等查樊戴王曾
崔胡等四千餘衆自雞公梁痛剿後所剩不過

三千人連日趕追擒斬與落水淹斃並來營請票及自行逃回外不下二千人其蒲添寶冉井

一股

臣

長齡孫清元吉林泰等臨陣察看實有

五千餘衆其中精壯戰手又多其勢已成大股

又遁向老林

臣

等揆度賊勢兵力輕重情形以

臣

長齡孫清元吉林泰兩路兵馬分投剿辦樊

逆等賊股

臣

德楞泰所帶官兵雖只五千餘員

名而能耐勞苦進山剿辦蒲添寶股匪較爲躋
捷樊逆一股只有千數百人若再將蒲逆大股
剿辦則全楚已無成股之賊大局即可戡定再

臣德楞泰前奏鋸鋸嶺游奕熊劉賊股聞臣督

兵東下後該逆卽出山至陳家坡分投竄入川
境茲據巫山辦理團寨總理知府景福都司袁
陞侯知州衙署巫山縣徐士林等先後稟報探

得該逆於十六日至楚邊界被達勒精阿等督
兵剿殺擒斬二百數十名搶獲馬騾旗幟極多
經獲犯認出首逆劉朝選首級一顆餘匪散逃
現在分投搜剿達勒精阿等差弁將首逆劉朝
選首級並質証難民七名口於十九日解到巫
邑_臣德楞泰查首逆劉朝選久爲著名首惡蹂
躪川楚日久稽誅茲幸得以殲斃實足以大快

人心

臣

飛飭達勒精阿等查明殲斃首逆係何

員弁兵勇分別獎賞出力人員徑報勒保大營
辦理此兩路官兵打仗間有受傷及陣亡兵勇
容俟另查咨部奏入

上命軍機大臣傳諭德楞泰長齡曰樊戴王曾崔胡
等匪前次德楞泰在雞公梁痛剿後所剩不過三
千餘人連日追趕擒斬及淹斃並自行逃回者不

下二千人現在剿剩者祇有一千六七百人賊勢頗形衰潰皆係德楞泰之功長齡一聞稟報亦卽督率官兵分路迎擊又殺賊一百餘名均屬奮勇可嘉現在節屆端陽德楞泰著賞給小荷包一個扇套一個香袋四個又加賞白玉四喜搬指一個鑲嵌帶鈎一副黃瓣大荷包一對小荷包四個長齡賞給扇套一個香袋四個又加賞白玉四喜搬

指一個黃瓣大荷包一對小荷包四個並發交德
楞泰扇五匣香串五匣香袋五匣著賞給此次出
力員弁一兩重銀牌一百面五錢重銀牌一百面
賞給此次出力兵勇又發交長齡扇五匣香牌五
匣香袋五匣著賞給出力員弁一兩重銀牌一百
面五錢重銀牌一百面賞給出力兵勇以示獎勵
又發去賞給賽冲阿溫春達勒精阿等扇套各一

個香袋各二個並著德楞泰分賞云云所稱蒲添寶
冉并一股賊匪實有五千餘衆精壯戰手又多現
向老林倚險抗拒德楞泰酌量輕重商令長齡孫
清元吉林泰分剿樊逆賊股伊專剿蒲添寶大股
實屬可嘉所見甚是德楞泰聲威素著帶領精銳
得勝之兵奮力趕剿自可一鼓殄除倘該匪情急
逃入川界務當跟蹤前往剿淨此股不遣餘孽爲

要如蒲逆大股剿淨後樊逆等股尙未辦竣德楞
泰仍當帶兵與長齡協力剿辦樊逆以期肅清楚
境佇鷹愁賞至樊王等股在楚省奔竄多時係長
齡孫清元等在彼辦理並未痛加剿殺經德楞泰
一經到楚卽連次得勝權其急緩以蒲逆一股人
數衆多親身督剿將樊逆等無多賊匪交與長齡
孫清元等接辦可見德楞泰並無邀功之心此股

人數雖少而樊逆爲兇狡首惡較之蒲冉等逆尤爲緊要長齡等得此機會當倍加奮勵滅此朝食若能將首逆樊人傑殲獲並將此股賊匪悉數剿除此則長齡等之大功捷音一到當立沛恩綸懋加寵錫再達勒精阿等一路將首逆劉朝選殲斃所辦甚好俟勒保奏到日再降恩旨

初入日

丁丑

勒保奏言

臣

於二十六日接據達勒

精阿武隆阿等報稱本月十四日探有青白等
號剿散餘匪一股自楚省竄來當卽帶兵探剿
十五日行抵青石背探得該匪已竄走白菓寺
相距七八十里連夜發兵前進行抵大堰塘知
賊匪正在白菓寺山坡散處達勒精阿等帶兵
由右手山嶺掩襲武隆阿等帶兵直向白菓寺
衝殺又派副將張良槐等帶兵由左手截擊黎

明時武隆阿一路兵勇先至乘賊不備一擁上前殺斃賊匪四五十名餘匪奔上峪口恃隘抗拒約有二百餘人時達勒精阿與張良槐等兩路齊到與武隆阿兵勇三面圍殺復擒斬五十餘名搶獲海驢馬一匹衆賊指係劉元帥之馬官兵知賊首棄馬潛逃諒蹤跡未遠卽分路盡力窮追復擒賊匪五六十名天晚撤回當據

活賊陳大明指認賊屍係劉元帥遂卽割取首級搜獲散賊三十餘名計此次打仗據各營官兵繳到首級耳記六十一副生擒活賊一百五十五名口搶獲旗矛等件甚多活賊內復訊出僞先鋒李翠旗手周大用彭彩牌頭王宣並戰手蕭貴等共五十二名復將所斬首級臚列令所獲男婦指認俱稱實是劉朝選之頭達勒精

阿等因留認識劉逆之男婦七名口並劉逆首級差弁解送來營查驗餘犯訊明正法難民解巫山縣訊明遞籍安插又據江北文武探報寧羗地界有賊匪一股奔竄距廣元邊界五六十里臣恐係張魏餘黨顏中考股匪折回當卽飛札豐紳探蹤迎截本月十九日探得該匪竄至寧廣交界之五郎溝豐紳卽令土人帶路由麻

柳壩取道該處距五耶溝五十餘里山路險仄
馬不能行豐紳督同將備均步行分路前進遊
擊唐際盛都司廖得亮等爲一路由右手戰馬
坑抄襲遊擊鄔海慶夏雲龍等爲一路由左毛
和尚坪抄襲豐紳親帶都司王國輔守備葛天
培等從中路衝殺行抵五耶溝該匪正在半山
茅屋內炊爨官兵三路蜂擁而進賊匪驚潰四

竄我兵乘勢追殺斃賊三十餘名滾巖跌斃賊
十餘名生擒賊十三名餘匪亡命向老林竄走
官兵追捕三十餘里復斃賊八名天晚撤回查
訊活賊張明學等供稱此股係李裁縫陳裁縫
二人爲首並非張魏餘黨等語豐紳訊明後當
將獲犯正法計此起剿剩餘匪尙有七八十人
已折回寧羗老林內一時探無蹤跡豐紳仍在

廣元邊界加謹嚴防又張績一路官兵在八廟橋地方搜山掠土人報稱附近夾耳漕內有賊匪藏匿遂帶兵前往於叢竹林內搜有藏匿零匪立時殺斃十二名生擒七名訊據活賊林均喜等供稱係徐添德股內打散零匪共有十九人在此逃避今已被官兵盡數擒殺等語張績等將所獲各犯正法仍移兵他處搜剿又張志

林一路官兵於二十一日探得有零匪百餘人
由石埡口竄走張志林當卽率同遊擊程元龍
門繼春晉之璉等帶兵分路抄截至花巖頭地
方趕及賊匪官兵緊躡追擊立斃賊十七名生
擒三名餘匪向大竹所屬矮子山一路奔竄我
兵跟蹤追殺沿途復斃三四十名生擒十五名
查訊活賊湯家寶等供稱此起係湯劉股內打

散餘匪只有旗手張子寧劉秉文二人帶領並
無要逆在內當將活賊逐一訊明正法餘匪尙
有數十人散竄無蹤張志林現仍帶兵搜捕其
田朝貴一路官兵在通江一帶防剿探得陝境
有楊姓零匪一股二三百人由竹峪關竄入田
朝貴當與遊擊羅思舉薛陞等分兵四路迎擊
羅思舉一路兵勇行至西鄉通江交界之白地

溝正值該匪由溝內竄來羅思舉率領兵勇迎
頭截擊賊匪卽折向白楊關奔竄羅思舉帶兵
緊躡追殺直追至天池寺一帶沿途殺斃賊匪
二十餘名生擒男婦二十五名口奪獲騾牛矛
桿羅思舉帶兵已追過陝界五十餘里因未携
帶鍋帳不能越境窮追遂卽撤回歸隊所擒男
婦就近解交通江縣審辦又據太平協副將李

廷臣太平廳同知鍾蟠雲稟稱通江地界普陀寨民王麟瑞王麟趾等盤獲賊匪湯思蛟之兄偽元帥湯思虎偽千總李仕武二名解送前來

臣

親提鞠訊據湯思虎供我與湯思蛟同祖弟兄嘉慶元年九月間起事先與王三槐冷添祿同夥後來官兵拿了王三槐殺了冷添祿我同湯思蛟又與徐添德合營連年奔竄今年春間

被官兵打散湯思蛟帶七八十人走了我同白
號張思聰等連夜逃竄官兵又追得緊因同這
李千總逃出欲走竹溪關過陝西去前日從普
陀寨邊境過被寨上人拿住等語又訊據李仕
武供稱亦係元年一同起事向在湯思蛟營內
先當戰手後充千總臣訊明後當卽一併凌遲
處死其盤獲要犯之寨首王麟瑞等卽照現定

賞格賞銀五十兩以示鼓勵

同日惠齡奏言近據探報苟逆賊匪見數路官兵逼剿緊急卽於二十一日夜從五大谷八大谷起竄二十二日五鼓潛至腰竹嶺攻撲遊擊林向榮營盤勢甚兇悍林向榮督兵施放鎗礮將賊擊退復帶兵出營追剿生擒賊匪四名大夥賊匪卽由火地西遁適總兵楊芳聞信趕到

卽令林向榮帶同馬隊抄進乾溝楊芳由火地
跟蹤追殺楊遇春亦帶兵趕到該匪入郭家溝
老林向西北奔逸經畧額勒蘇保派令扎克塔
爾等抄至西北小王澗截剿楊遇春亦由火地
向西北兜擊適該匪竄至小王澗正遇扎克塔
爾等一路官兵迎頭截擊斬獲數十人該匪驚
惶折竄分爲兩股一由小王澗南奔一由安溝

逃向東南連日大雨連綿額勒登保督率扎克
塔爾楊遇春楊芳分路兜擊其苟逆內又分出
零匪百餘人在板房溝一帶老林游奕經楊芳
派令軍功蒲子琴等帶領兵勇入林搜剿擊斃
多名餘賊四散逃竄臣復飛催該軍功等趕緊
分投搜捕以免牽綴至張魏餘匪前經提督慶
成剿散分爲兩股其竄往寧義境內一股賊匪

由蒿壩溝老林南竄乘夜偷撲都司李懷玉營
卡李懷玉督兵施放鎗礮擊斃賊匪數人賊匪
於黑暗中撲入營盤將官兵衝散李懷玉持弓
四射力戰陣亡弁兵鄉勇間有損傷賊匪卽竄
往川省廣元境內其竄至紫柏山老林一股賊
匪經慶成搜捕在三溝腦一帶殲斃三十餘人
生擒一二十人慶成現仍督率兵勇尋蹤搜捕

其劉永受餘匪人數無多連日據軍功劉盛朝
搜獲零匪蕭自奉等十四名解送來營臣督同

委員訊明將積年矛手正法其被裹難民就近
發交鄂縣關查原籍遞回安業又據署孝義同
知孫樹署都司張立功搜殺零匪五名拏獲三
名又據把總賈玉成等拏獲探馬頭曹自富俟
解營審辦尙有老掌櫃王作正一名現仍尋蹤

訪緝諒可不致遠颺惟劉永受一逆自二月十
五日經楊遇春剿敗帶傷潛逃後總無下落茲
經額勒登保派搜山軍功廖友等訪出該逆
於二月二十五日逃至太平峪居民呂文明家
乞食呂文明見其身帶矛傷知是賊匪因憶其
子被賊殺害懷恨已久卽用柴斧將該逆砍斃
因不知係緊要首逆遂將屍身拋棄巖洞未經

報官經該軍功等起出屍首山內氣候甚寒尙未腐變當令所帶眼線識認實係劉永受屍身並起出該逆所帶金錫戒箍等物該軍功等卽割取首級攜帶呈驗臣卽令營內所獲活賊指認首級無悞復飭令該軍功等趕赴額勒登保大營呈驗實係首逆劉永受無訛該逆旣被殲除餘孽陸續搜獲是此股賊匪業已完竣

同日陸有仁奏言連日探得張魏餘匪一股經
慶成派兵截剿連次俱有斬獲並將賊首魏洪
升賊目白庸張喜生擒現尚有賊匪百餘人潛
伏棧西奔竄無定慶成正在分兵搜剿又西鄉
邊界元坪子一帶復有賊匪一股約二三百人
竄入經總兵九十督同查寨委員易萬里分帶
兵勇堵剿殲賊十餘名生擒五名餘匪已自白

楊關一帶折回川境訊據獲犯供稱此股係冉
添元餘黨又查苟逆股匪竄匿南山老林爲日
已久額勒登保楊遇春等現旣顧住東北分兵
數路步步逼剿賊匪一出老林自必易於得手
所有各營糧餉更須隨地隨時寬爲接濟臣節
經嚴飭糧員並地方官無論穿林入箐到處源
源運供未敢稍有缺悞軍糧一項前蒙

聖恩准於江西協撥所有補解陝省兵米六千餘石
現尙未出楚境

臣

隨節次飛檄傳催並諄切咨

會楚省撫藩務須嚴飭沿江一帶地方官迅速

饋運現復派員赴楚沿路飭催當不致再有延

玩其湖南運到之糧現在供應平利安康紫陽

石泉西鄉南鄭褒城一帶各路防兵並運供南

山寧陝等處各營征兵之用每月所需已不下

二萬餘石至西路寧羌畧陽沔縣一帶所駐慶
成慶溥永明胡定泰等各路防兵爲數甚多該
處素非產糧之區不能多爲採買若將運到南
鄭等處之糧再行轉運此數站水路不通陸運
腳費未免過大因思川省雖現辦軍需究係產
糧之地積貯自當充盈若自保寧等處酌撥倉
糧運至川陝交界之朝天關此一帶俱有水路

可通隨經札致督臣勒保熟商茲據覆信已於
川西江安等處碾米一萬石由水程趲運而來
臣現派專員前赴朝天關僱備夫騾接運至寧
羌存貯以便分解各營應用均奏入

上命軍機大臣傳諭勒保曰劉朝選一犯係緊要首
逆輾轉稽誅爲日已久前日德楞泰摺內卽有川
省官兵將首逆劉朝選殲斃之語今據勒保奏稱

達勒精阿等在大昌一路殲斃賊匪一百六十餘
名生擒一百五十餘名訊出僞先鋒旗手等五十
二名並將首逆劉朝選殲斃所辦可嘉達勒精阿
武隆阿及副將張良槐著加恩交部議敘此時川
省情形祇係剿辦餘匪勒保派令豐紳張績張志
林田朝貴等分路進兵固須督飭該提鎮等認真
搜捕但於剿辦之中尤當嚴防濫殺卽如本日勒

保摺內稱張績一路官兵在八廟橋地方聞有賊
匪十九名藏匿竹林帶兵前往立時殺斃十二名
生擒七名亦隨卽正法訊明係徐添德股內打散
零匪等語此十九人祇在林內藏匿並無抗拒形
跡其所稱徐添德股匪之說止係訊之獲犯林均
喜而林均喜亦已於訊明後正法有何憑據安知
非兵勇等挾仇戕害或更希冀邀功而張績又並

未親到亦不過據弁兵一面之詞爲之轉報設果
誅及無辜則該處民人必致心懷惶懼於事甚有
關係惟在勒保仰體朕意密飭該提鎮等於搜獲
匪犯一事必須確有指據方行正法毋令兵丁等
輒行擅殺獻級冒功致啟挾仇枉殺之漸所有此
次張嶺等稟報搜捕之賊真僞尙難憑信亦不值
加以優獎總之賊匪誅不足惜而良民不可殺此

時兵勇銳氣方盛賊氣已衰不可恃強凌弱所謂弱者非賊也乃謂賊之所困之難民也至豐紳等在廣元邊境堵剿現據惠齡奏張魏係匪有竄至該處者亦應飭令豐紳上緊截剿勿任再有奔竄又湯思蛟一犯久未弋獲現在太平境內盤獲賊匪湯思虎一犯既訊係湯思蛟之兄自必知該犯逃竄蹤跡著勒保飭屬嚴拿此後遇有擒獲之賊

隨時跟訊爲要

臣等謹案軍營濫殺之弊最爲慘酷小民避賊求生橫罹鋒鏑或官兵誤認爲賊而至死無以自明或官兵明知非賊而枉死不能自辨其間挾仇報復厭級冒功情事在所必有我

皇上仁慈廣覆周悉弊端

特於搜捕零匪之時

嚴切詰誡必令將獲犯詳悉訊明然後正法無許弁
兵擅自誅戮以致真偽無憑仇殺自便恃強
凌弱

訓戒諄諄所以殲除數十萬莠民而未嘗殺一不辜
迓祥和而消沴戾豈非

大德在生歟

同日

上命軍機大臣傳諭惠齡曰苟逆股匪經額勒登保督同扎克塔爾楊遇春楊芳等分路截剿昨據額勒登保奏到情形與惠齡所奏大畧相同此次惠齡摺內已有連日大雨聯綿之語朕前此屢次嚴催卽慮及盛暑之時軍營必以雨水爲辭今甫及五月初旬雨水尙不甚大何遽至道路阻隔總須

趁此水潦未盛之前趕緊剿辦歲事惠齡仍在山
外峪口一帶實力堵禦不可稍有疎懈一得額勒
登保打仗捷音卽迅速馳奏以慰厯注劉永受一
犯旣經鄉民砍斃指驗屬實曹自富又已擒獲此
股賊匪自卽可辦竣至張魏餘匪分竄情形昨亦
據慶成奏到其竄往寧老境內賊匪竟敢乘夜撲
卡都司李懷玉持弓射賊力戰陣亡甚爲可惜著

咨部賜卹

上命軍機大臣傳諭陸有仁曰此時官兵數路逼剿
賊匪一經轟出老林辦理自易得手所有各營糧
餉尤應寬爲預備現在湖南解陝之糧早經運到
勒保又於四川碾米一萬石由水程趲運赴陝軍
糧已屬充裕其江西協撥兵米六千餘石業經在
途陸有仁惟當嚴飭經過各地方迅速趲行俾得

源源接濟毋任稍有缺乏此爲最要

欽定剿平三省邪匪方略正編卷三百十六

壬戌年

五月十一日

庚辰

額勒登保奏言

臣

與楊遇春扎

克塔爾分投兜剿苟逆股匪

臣

帶領馬步兵勇

自江口苦竹溝抄往東面而進二十六日趕抵

八里坪據報該匪等知扎克塔爾格布舍之兵

向兩河顧定北面進剿楊遇春李應貴從甘家

砭五郎阿旁路抄擊楊芳緊躡追剿卽奔小河

有竄秦嶺之勢

臣

恐其翻越秦嶺逃入各峪內

游奕隨卽帶兵取道於西北面探蹤兜截途次

接據楊遇春等報稱該匪於二十四日向天朝

廠大梁竄遁卽一面於火地先行設伏一面帶

同侍衛噶拉傳陞率領馬步兵勇趕至太山壩

適賊衆由南溝分竄我兵迎頭剿殺李應貴亦

由另路帶兵趕到該匪見兩路兵至不敢拒敵

向北溝大梁林等內亂竄兵勇奮勇競進趕過
三重大山殺賊四十五名生擒三十八名搶獲
旗幟長矛時已昏黑該匪匿入七里溝竄上秦
嶺老林當卽查訊活賊內有僞先鋒劉允賢旗
手李文明田用富等三名據供營內除元帥苟
文明之外還有張姓兩個弟兄管事先鋒旗手
尚有七八人連被官兵剿殺要乘官兵都在東

南兩面我們直往西去過棧道搶掠又好躲避
不意迎頭遇見官兵等語當將該犯並積年矛
手胡文富等二十八名分別凌遲正法其被裹
未久者均卽省釋又據扎克塔爾格布舍報稱
二十六日自安溝冒雨前進探得板房子有賊
匪竄出卽督催兵勇趕行甫抵小王澗探差飛
報賊股均竄化山華基寨老林邊分擾當卽發

隊往剿該匪正在圍攻該匪基寨格布舍帶同侍衛德勒奇善副將張璠等由左手山塢衝擊該匪分股迎拒我兵奮力直前殲斃十數名該匪敗退官兵乘勢掩擊將賊截爲三段有向紅巖溝奔逃者有向東溝刺木扒分竄者格布舍張璠及扎克塔爾等帶兵分投追剿該匪亡命分遁深林初更後撤隊回營兵勇等共殺賊五六

十名擒獲活賊五十四名割獻耳記二十四副
旗幟刀矛共一百餘件訊據獲犯余魁元等供
稱前在南溝太山壩被官兵殺敗商量趁這面
無兵向板房子一帶往峪裏去藏躲因這寨上
有糧正在圍攻不知官兵突然到來大家四散
奔走等供遂將大旗手王洪士胡朝平凌遲處
死其餘從賊日久之余魁元等三十七名概行

正法難民給票釋放探得東溝之賊連夜與紅

巖溝之匪合併向杜家墳奔走我兵卽由杜家

墳跟剿

臣

查該匪連被追剿或竟東趨卽派叅

將吳亨衍分帶兵勇從秋木庵赴碾道一帶迎

擊

臣

督兵仍入溝峪由紙房溝頭東抄擊連日

大雨如注官兵等盡由河溝內穿越而行水勢

暴漲灘深溜急前後間隔兵役淋漓露處且有

淹斃者急切不能前進

臣

焦急倍常一俟天色

稍晴卽行督催進剿至劉永受尙無下落昨又

據拏獲賊匪黃一升等八名供稱劉永受前被

官兵衝散後潛往潞峪內之手扳寨民人房屋

存住等語當卽密派軍功兵勇改裝易服帶領

黃一升及投出難民吳中魁作爲眼目前往密

行緝捕據查得寨民呂文正呂文成與伊姪在

寨下看守房屋前月有賊匪十九人到伊屋內
將呂文正呂文成捆縛將伊姪殺死賊匪住宿
一夜次日有一劉姓向呂文正等說能收留我
在家我就保全爾等性命呂文正等應允劉姓
便在伊家住下呂文正以衆人呼劉姓爲掌櫃
疑是頭目因伊姪被賊殺死氣憤莫遏卽於是
日乘劉逆昏睡之時取斧向頭上猛力打死將

屍丟在炭窑內晚間又有一人到來自稱姓袁
我尋劉掌櫃呂文正令其畧待並讓其飲酒至
夜深時乘空亦用斧打死將屍拋在窑內起出
屍身據難民吳中魁辨認實係首逆劉永受及
僞先鋒袁姓并有劉永受所帶金鐲二隻戒指
一個臣復令投出新勇內有素識劉永受者隔
別指認亦僉稱係該逆無疑可見該逆罪惡貫

盈難逃法網當將軍功岳貴廖友民人呂文正
呂文成等逐一分別賞賚該逆股內當有逃散
之人茲除拿獲之黃一升等八名卽予正法外
近又經惠齡分派兵勇入山緝獲十數名是此
股已無餘孽現仍札飭嚴加搜捕並不得將擒
獲之人擅行殺害至我軍連次接仗兵勇間有
傷亡以及被水淹斃者容俟查明咨部辦理

同日德楞泰奏言

臣

前與長齡會合分投剿辦

蒲添寶賊匪於二十四日督兵前進是日巳刻
卽陰雨淋漓晝夜不止兵馬未敢暫息霑體塗
足縱極力趕行一日不過三四十里至二十七
日抵豐玉坪前有大河一道約寬二十餘丈雖
已水漲察其溜勢稍緩之處卽令兵勇砍伐樹
木趕緊搭架橋梁二十九日兵勇隊伍均皆卸

鞍鍋帳一切皆背負而過至於馬騾盡行洶渡幸俱平順是夜雨勢益大凡有溪流無不驟漲

臣

鼓勵將弁兵勇冒雨而行初一日申刻趕至

南陽河見河身雖窄其內亂石嶒嶸水勢建餅洶湧當令兵勇設法架造橋梁一夜一口方得濟渡初三日雨勢越大橋被衝去淹斃兵勇數名夫役十數名欲再架搭一時水高二丈有餘

而雨霧益甚人功萬難下手竟將兵馬隔斷於
溪河兩岸至今雨仍未止探得蒲添竇洵河漂
沒賊衆二三百名亦爲水阻於當陽河一帶該
處東通房縣西走大寧若兵由大道抄出房境
或繞至大寧不但程途太遠倘該逆聞風東折
則是欲速反遲是以酌量情形必須入山尾躡
較爲靠實現在相距不過百數十里聞該逆有

南竄歸州龔家橋之勢如果南來正可探明分
投迎剿惟旬日淫雨不止力不能施臣私衷焦
灼卽將領弁兵亦無不憤懣急切惟有籲懇

聖恩稍爲寬緩俟得天氣開朗溪漲自必易退諒此

烏合之衆

臣

卽率輕騎趕剿兩三仗定可瓦解

斷不令再稽時日總之川陝楚三省此時惟蒲
逆勢較鴟張然大半均係擄掠被脅之徒一經

痛剿勢皆膽落

臣

萬不敢以功虧一簣藉雨稍

爲鬆勁以致賊勢衰而復熾上負

主恩均奏入

上命軍機大臣傳諭額勒登保曰苟逆股匪經額勒
登保督同扎克塔爾格布舍楊遇春楊芳等分投
追剿該匪復由七里溝竄上秦嶺老林實爲可恨
現在額勒登保帶兵仍入滂峪抄擊據稱連日大

雨如注水勢暴漲灘深溜急官兵急切不能前進
等語適召見長麟詢問該處情形亦稱秦嶺老林
內險窄異常兵力實難進剿是賊匪一入老林轉
得佔據地險苟延殘喘若惟爭入山搜捕輾轉奔
馳徒勞何益譬如醫者治病投藥不效自當改易
前方另投他劑若膠柱鼓瑟何時始能竣事苟逆
入山已經半年有餘額勒登保原期將賊匪轟出

老林於峪口一帶聚而戲侮不令其竄出平原致
峪口村莊遭其蹂躪乃苟逆入山以後官兵旣難
追捕而賊匪在山內仍然攻寨掠食該處居民亦
不免於擾害何如設法誘令出山聽其竄向一路
再加截剿較爲得計卽以掩捕狐鼠而論若任其
深藏窟穴豈能入洞搜尋必須熏之使出方可乘
間捕獲況訊據活賊供稱商量要乘官兵都在東

南兩面直往西去過棧道搶掠之語是賊匪之意
原思出山西竄額勒登保何不將計就計設法驅
逼現在賊匪不過千人我兵不啻十數倍於賊止
須密爲布置遙作聲援卽賊匪果竄至棧西或竟
竄入川楚邊境亦何難跟蹤剿辦此時寧羌一帶
有慶成等在彼甘省交界有朱爾漢帶兵防堵賊
匪出林西竄前有迎擊後有追兵正可收兩面夾

攻之效額勒登保可卽遵照此旨相機辦理較之在山內輾轉奔馳自易得手

上又命軍機大臣傳諭德楞泰曰德楞泰奏官兵自抵豐玉坪後適因連日陰雨溪流漲發所搭橋座俱被衝去以致兵勇淹斃數名現在雨仍未止溪流奔騰兵馬驟難前進俟天氣開朗後卽率輕騎趕剿等語德楞泰帶兵打仗素爲奮勇此次道經

蒲添寶股匪因雨水阻隔不能前進自係實在情
形斷非藉此鬆勁此時官兵旣爲雨阻賊匪亦必
爲雨水所困該匪等因淌渡漂沒二三百名在當
陽河一帶屯聚想日內自尙未遠颺德楞泰轉無
庸過於焦灼一俟天色晴霽可以進兵卽當鼓勵
兵勇趕上賊匪痛加剿殺一有捷音卽速馳奏所
有此次淹斃兵勇等著各部賜卹

十三日

壬午

勒保奏言查此時川境剿剩餘匪約

尚有四五起

臣

節次嚴催剿辦二十八日副都

統銜達斯呼爾岱副將羅聲舉等在龍潭河地

方遇有賊匪二十餘人當經遊擊張拱辰都司

馬建廷等帶領兵勇將該匪等全數殲擒內有

探馬頭王萬里一名訊據供稱有白號餘黨一

百四五十人現由响水洞竄至九子漕古佛碛

內係庾老師傳帶領內有張二掌櫃宋總兵楊
總兵熊先鋒等都在一處因怕官兵叫我們出
來探信等語達斯呼爾岱羅聲臯等當將該犯
等正法隨即派令叅將蕭鳳來都司文自新守
備楊杰等分帶兵勇連夜冒雨由潼寧關抄道
前進達斯呼爾岱羅聲臯等帶領兵勇由井溪
壩潘家灣一帶取道進發次日午刻蕭鳳來等

行抵古佛祠賊匪聞信卽驚惶起竄官兵一擁
上前殺斃賊二十八名生擒三十三名並將張
二掌櫃擒住奪獲賊旗矛杆其虔逆帶領餘匪
七八十人向鳳凰山竄走正遇達斯呼爾倫羅
聲臯等一路兵勇截住鎗箭齊發立斃賊二十
餘名生擒十二名餘匪向井溪壩沿河奔竄官
兵前後兜圍將首夥各逆四十七名全數生擒

並無一名漏網達斯呼爾岱羅聲臯等查訊所
獲賊首廣姓卽係老教首逆廣向瑤並於餘賊
內訊出偽總兵楊繼華偽先鋒熊品二名其餘
皆係戰手又於賊屍內認出偽總兵宋長子一
名割取首級一併稟解前來臣查廣向瑤一犯
前於嘉慶五年八月間叅贊德楞泰與臣在太
平箭口河地方帶兵圍剿當時訊據活賊黃俞

等供稱眼見該逆跌巖落水曾經奏明在案近
日並未聞該逆蹤跡何以此次生擒首逆又稱
度向瑤當卽飛提各犯親加查訊據度向瑤供
我係東鄉縣人向從冷添祿學習邪教嘉慶元
年九月間與冷添祿王三槐湯思蛟劉朝選符
曰明在豐城地方一同起事人多稱我爲度老
師傅連年與官兵打仗不記次數前年八月間

在杜家灣地方打敗我帶幾十人逃到箭口河
官兵追得緊衆人情急鬼水過河因水勢溜緊
淹斃多人我順溜淌至淺灘上岸逃走我著湯
思蛟劉朝選的營頭就一路同走上年十一月
間我與湯思蛟劉朝選在城口老林內被兵打
散我帶幾十人分營逃走在老林內各處藏躲
因沒有糧食二月間出來到雙河口會著宋國

品合營幾天又被官兵打散四月二十日在桑
渡河遇見同號的張二掌櫃名叫張思從合夥
在古佛祠藏匿有官兵前來追殺我帶七八十
人逃到鳳凰山又被官兵趕來拿住並訊張思
從係雷士旺之大徒弟賊營內都稱爲二掌櫃
雷士旺被官兵殲斃該犯卽分路各處竄走各
等語質之同獲各犯及軍營平日認識該逆等

之眼目均指認現獲賊首係庾向瑤是實查
該逆從前跌巖落水本未撈獲屍身今據供淹
而未死連年在各處逃匿日久稽誅仰伏

皇上天威復將該犯生擒可見此等積年首逆罪惡

貫盈斷不能倖逃法網

臣

審明後當將該犯庾

向瑤及老教掌櫃張思從偽總兵楊繼華偽先
鋒熊品一併戮割處死並梟首示衆其餘戰手

概行正法至總兵張績一路前在八廟橋地方將零匪一股辦淨後適探得賊匪一起在豐城地方竄走張績當卽帶領官兵探踪追擊該匪聞信卽連夜奔逃官兵冒雨窮追至沙罐場適總兵田朝貴一路官兵探聞賊蹤三更後乘夜發兵前進該匪正在山叻草房內避雨歇息田朝貴率同參將張明德遊擊王忠桂等帶領兵

勇乘其不備四面圍住將草房點火焚燒該匪
驚覺四竄官兵在火光中刀砍矛戳殲斃一百
一二十名生擒二十八名稟解前來臣親加查
訊此起賊匪係徐添德之堂兄徐添培爲首嘉
慶元年九月與徐添德一同起事賊營都稱爲
大師傅後因官兵追殺得緊改名鐵板道人衆
人又呼爲鐵元帥上年在西鄉地方被官兵剿

急帶領二三百人作爲一路秋冬總在竹谿竹
山一帶往來逃避本年二月間從界嶺過來與
王山合夥被官兵連次剿散只剩一百四十多
人昨逃至沙罐場被官兵擒獲其活賊內有僞
先鋒劉學受一名係首逆劉學書之弟臣訊明
後一併凌遲處死其餘戰手概行正法查川省
各路官兵踴躍爭先叠次殲除餘孽近日冒雨

剿賊不遺餘力將著名首逆生擒並將積年老
賊多名同時殲獲實屬奮勉出力當此功屆垂
成正應量加賞賚以勵兵心除生擒首逆虔向
瑤及擒斬各賊目之官弁兵勇查明另行核辦
外臣當卽提取賞銀二千四百兩先行分賞各

路兵勇俾知奮勉至此時川北一帶僅有陳李
二裁縫一股零匪在寧廣交界地方游奕人數

無多又楊姓股匪前經田朝貴一路兵勇截剿
追至陝境天池寺近聞仍在川陝邊界竄匿現
有豐紳在廣元南江一帶防堵田朝貴在通江
一帶防堵兩路兵勇各有二千餘名足資剿辦
其東鄉開縣前中後三河及雲陽一帶餘匪無
幾有張續達斯呼爾岱羅聲舉等分投搜捕亦
可卽日肅清惟叅贊德楞泰已深入楚境夔門

一路較爲喫緊雖有達勒精阿武隆阿等在彼
防剿恐兵力尙單卽添派鎮將前往亦恐布置
未能悉臻妥協茲

臣

卽帶同總兵張志林一路

官兵一千七百餘名前往夔府察探楚匪情形
卽於巫山大寧一帶擇定要隘與達勒精阿武
隆阿等分路防守顧住川楚邊界並可順便搜
捕奉巫等處零匪其大竹梁山等處本係張志

林帶兵搜捕今張志林既同

臣

前赴夔門薛大

烈病尙未愈此外再無鎮將大員可派查有叅

將傅廷佐素日帶兵得力茲撥給兵勇八百名

令其赴大竹梁山一帶往來搜捕惟是夔府爲

川省極東之處

臣

若久駐其地距西北太遠軍

情旦夕不同設陝境苟逆等股匪竄來恐各鎮

將不得主意

臣

遠在夔門鞭長莫及擬俟將軍

路布置妥協後仍回達縣東鄉一帶適中之地
以便兼顧各路奏入

上命軍機大臣傳諭勒保曰首逆虔向瑤與冷添祿
王三槐等同時在川省地方滋擾日久稽誅前年
在箭口河猝遇官兵情急撲水被淹未死又復潛
匿老林近與張思從等合夥在古佛洞藏匿經勒
保飭催達斯呼爾岱羅聲臯等帶兵冒雨搜捕將

此股零匪悉數殲擒並將首逆庾向瑤及老教掌櫃張思從一併拿獲其豐城地方一股零匪係徐添德之堂兄徐添培爲首改名鐵板道人並有鐵元帥之號此次在沙礮場竄擾經總兵田朝貴率同將弁上緊追殺將該逆生擒此等積年逆首罪惡貫盈自難倖逃法網今被擒獲立正刑誅實足以快人心而彰國憲勒保調度有方達斯呼爾岱

田朝貴羅聲皋冒雨帶兵能將逆犯擒獲甚爲出力均著交部議敘並賞給勒保四喜白玉搬指一個鑲寶石帶鈎一副黃辨珊瑚豆大荷包一對小荷包四個達斯呼爾岱田朝貴各賞給花大荷包一對小荷包二個又發去玉搬指十個磁鼻烟壺十個珐瑯翎管十個分賞出力員弁一兩重銀牌二百面五錢重銀牌二百面賞給打仗出力兵丁

用示獎勵勒保摺內稱率同總兵張志林等帶兵
前往夔府察探楚匪情形卽於巫山大寧一帶擇
要嚴防顧住川楚邊界所見甚是至所稱俟將東
路布置妥協後仍回達縣東鄉一帶以便兼顧苟
逆此則不必陝省苟逆有經畧在彼督辦節次剿
殺所剩不及千名若果轟出山外自必就地殲除
斷不肯任其闖入川境復致再稽時日且川北地

方雖有陳李二裁縫及楊姓等股零匪在彼奔竄
爲數無多豐紳係本省提督現在廣元南江一帶
防守又有田朝貴帶兵在通江等處堵禦兵力足
資剿辦勒保自可無須兼顧惟當率領張志林一
路官兵在川東防堵並督同達勒精阿武隆阿等
搜捕零匪緊顧川楚邊境此時楚省漸添寶股匪
人數衆多恐被德楞泰剿捕緊急又思逸入川境

其樊人傑等匪亦恐長齡等逼剿入川勒保在川
東駐劄設該匪等乘間窺至即可相機迎截與德
楞泰等共收夾擊之效

十六日

乙酉

德楞泰奏言

臣

前督兵入山冒雨趕

抵南陽河爲溪漲阻渡初四日據探報賊衆亦

被當陽河水阻折回

臣

恐水退後該逆又復遠

颺卽令先已過河之總兵滿尙佐副將馬元叅

將李東山沈洪等先行前進午刻雨止水消一
半是夜四更後忽聞前山礮聲不絕料必賊匪
撲營官兵鎗礮轟擊蒲尙佐等所帶兵勇不過
二千人未免見單而昏夜之中水勢莫測無法
可濟天甫黎明卽令兵勇趕緊搭橋辰刻橋成
兵勇人夫渡訖其馬騾仍係鳧水而過臣途次
卽據蒲尙佐馬元等差弁解到獲犯王允恭等

六十三名追抵王家堙大梁見我兵營外鹿角
扳倒數處血跡甚多查點各營殲斃賊屍八十
三具旋又據馬元等帶到活賊瞿仁等一百零
七名耳級七十三副刀矛旗幟極多訊據獲犯
王允恭瞿仁等供稱這是藍號蒲元帥他營裏
有五六千人見官兵追趕又進山來要走當陽
河到房縣山裏去不料河水驟漲又折回獨木

礮聲門戶要到東湖去探得官兵來的不多王
家垵地方只有四個營盤蒲元帥叫冉苟兩個
先鋒挑了二千好戰手夜裏悄悄來偷營不知
官兵利害打死及帶傷者甚多苟先鋒親自督
戰帶傷逃走衆人纔跑起來官兵又趕上擒殺
不少我們被拿等語訊明王允恭瞿仁等一百
七十名均係精壯戰手臨敵擒獲一槩正法

臣

查蒲尙佐馬元等是日乘雨行抵王家堽山梁
距賊只有六七十里是以卽於堽口拏營四座
而該逆知大隊兵爲水間隔又見營盤無多乘
夜撲營蒲尙佐馬元李東山沈洪等各率兵勇
鎗擊箭射復用礮轟打竭力抵敵於黑暗之中
直至五更後賊衆始行敗逃蒲尙佐馬元李東
山等復酌帶兵勇緊跟掩殺追至十五里外之

碩頭溝口天已黎明該處兩山壁立巖溝內道路窄小泥濘淤深前賊擁擠不開後賊遂回身抗拒捨死不退兵勇極力剿殺又斃賊一百二十餘名生擒一百零七名追出溝外忽見前面獅子堽山梁復有賊夥前來接應蒲尙佐等見賊衆兵單未便輕進遂卽撤回而接應之賊見官兵未追亦卽半途而返

臣

剿辦教匪以來凡

遇大股兇悍賊衆與之對敵如殺傷數十人或數百人無不立即敗竄從未見有賊匪被殺多人愍不畏死仍然抗拒而不退者其兇悍情形實堪痛恨

臣

又探得黃號賴先鋒賊股七八百

人聞

臣

督兵趕剿滿逆入山該匪遂由長峰堆

子向南而遁或西入川境或東竄歸巴均未可

定

臣

已飛飭達勒精阿武隆阿七十五等隨時

探明兇犯並移咨勅保查照又探聞樊戴等逆賊股已被長齡等截剿西折亦有斬獲茲_臣於

初七日已過龍門河趕抵琵琶河探得蒲逆賊

匪由獨木礮鄔家埡女兒溝竄往木樹三坪查

此一帶均係老山箐林羊腸鳥道該逆竄走不

能迅速

_臣

現在酌將兵勇分爲兩路追擊該逆

或竄房縣之九道梁或向川境之大寧均難預

定

臣

惟有帶兵窮追趕剿完竣再當酌量另辦

他股奏入

上命軍機大臣傳諭德楞泰曰蒲添寶股匪探知大隊官兵爲雨水所阻其先經渡河之蒲尙佐等兵數較單輒敢乘夜齊撲各營迨經官兵奮力抵敵始行擊退而賊匪奔走至十數里外復又回身抗拒愍不畏死實可痛恨看此情形賊勢尙形兇悍

且據獲犯供稱其營內尚有五六千人精壯戰手
尚有二千現又竄往木樹三坪一帶均係老山箐
林不可不趕緊剿辦又據奏黃號賴姓賊股七八
百人聞知德楞泰趕剿蒲逆該匪遂向南而遁或
西入川境或東竄歸巴現今移知勒保督兵兜剿
等語川省邊界現有達勒精阿等在彼防堵昨據
勒保奏到伊現又前赴川東夔府一帶察探楚匪

情形此股賊匪如竄往川境勒保自能設法堵剿
若東剿歸巴與德楞泰相距不遠並當分派將弁
前往截剿勿令奔軼至樊戴等逆經長齡等截剿
西折難保其不與蒲逆股匪合夥奔竄德楞泰尤
當留心偵探倘該匪等竟合夥一處長齡等在後
追剿更可互相知會兩面兜截爲滅此朝食之計
德楞泰惟當勉之又勉速成大功以受恩眷